

Մթնոլորտային օդի պահպանության բնագավառում 2025-2030 թվականների ծրագրի իրականացման վերաբերյալ

airquality.am հանրային նախագիծը զբաղվում է Հայաստանի Հանրապետությունում մթնոլորտային օդի որակի վերաբերյալ տվյալների համախմբմամբ, վերլուծությամբ և տեսապատկերմամբ՝ քաղաքացիների բնապահպանական իրազեկվածության բարձրացման և բնապահպանական տեղեկատվության բաց հասանելիության ապահովման նպատակով:

ՀՀ կառավարության 2025 թվականի մայիսի 22-ի N 611-L որոշմամբ հաստատվել է մթնոլորտային օդի պահպանության բնագավառում 2025-2030 թվականների համալիր միջոցառումների ծրագիրը [1]:

Հիմք ընդունելով «Տեղեկատվության ազատության մասին» ՀՀ օրենքի 6-րդ և 9-րդ հոդվածները՝ խնդրում եմ տրամադրել ծրագրի իրականացման ընթացքի վերաբերյալ տեղեկություններ և առկա փաստաթղթեր՝ պատասխանի օրվա դրությամբ, առանձին ներկայացնելով 2025 թվականը և 2026 թվականի անցած ժամանակահատվածը:

1. Ծրագրի կատարումը: Խնդրում եմ տրամադրել ծրագրի գործող խմբագրությունը և փոփոխությունները, հավելվածի բոլոր կետերի վերաբերյալ առկա ամփոփ հաշվետվությունը՝ նախատեսված ժամկետը, պատասխանատուն ու համակատարողները, փաստացի արդյունքը և հաստատող փաստաթղթերը: Չավարտված միջոցառումների համար խնդրում եմ նշել պատճառներն ու թարմացված ժամանակացույցը:

2. Ավտոմատ դիտակայանները, կետ 1.1: Խնդրում եմ հայտնել 2025 թվականի համար նախատեսված երկու և 2026 թվականի համար նախատեսված չորս դիտակայանների ձեռքբերման ընթացքի մասին: Յուրաքանչյուրի համար խնդրում եմ նշել հասցեն, մոդելը, չափվող աղտոտիչները, տեղադրման, ստուգման և շահագործման հանձնման ամսաթվերը: Խնդրում եմ առանձին ներկայացնել Կենտրոնի և Քանաքեռ-Զեյթունի երկու դիտակայանների, ճապոնական դրամաշնորհով մատակարարումների և Երևանում վեց անշարժ դիտակայան ունենալու թիրախի կատարման վիճակը:

3. Համակարգի արդիականացումը և բնակչության իրազեկումը: Մեր N 2120066 դիմումին տրված՝ 2026 թվականի հուլիսի 24-ի պատասխանում նախարարությունը հայտնել է տեղեկատվական համակարգերի արդիականացման ընթացիկ աշխատանքների և տվյալների փոխանակման գործիքների նախատեսվող ներդրման մասին: Խնդրում եմ նշել այդ աշխատանքների ավարտի և չափումների արդյունքների, այդ թվում՝ PM2.5-ի և PM10-ի, հանրային հասանելիության ապահովման նախատեսված ժամկետները: Օդի բարձր աղտոտվածության դեպքում բնակչության իրազեկման ի՞նչ ընթացակարգեր են գործում:

4. Ֆինանսավորումը: Խնդրում եմ ըստ միջոցառումների տրամադրել 2025 և 2026 թվականների համար նախատեսված, հատկացված և փաստացի ծախսված գումարները, ֆինանսավորման աղբյուրները, գնումների, պայմանագրերի և շահագործման ծախսերի մասին տեղեկությունները: Ինչպե՞ս են ծախսերը բաշխված պետական բյուջեի և դոնորական ծրագրերի միջև՝ ներառյալ ճապոնական դրամաշնորհն ու EU4Clean Air in Armenia-ն:

5. Փոշենստեցումը, կետեր 2.1-2.2: Խնդրում եմ տրամադրել ընդունված ակտերը և շինարարության ու օգտակար հանածոների արդյունահանման ոլորտներում դրանց

կիրառման մասին տեղեկությունները: Երևանի համար ծրագրում նշված է 2025 թվականի դեկտեմբերի առաջին տասնօրյակը, իսկ ընդհանուր ժամկետը 2026 թվականի սեպտեմբերի երրորդ տասնօրյակն է: Ի՞նչ է կատարվել, ինչպիսի՞ն է հաջորդ փուլի պատրաստվածությունը, և ի՞նչ վերահսկողական արդյունքներ արդեն առկա են:

6. Պատասխանատվությունը, տրանսպորտը և իրազեկումը: Խնդրում եմ հայտնել Վարչական իրավախախտումների վերաբերյալ օրենսգրքի 81.1-ին հոդվածին առնչվող նախագծի վիճակը (կետ 4.1, 2026 թվականի սեպտեմբերի առաջին տասնօրյակ), ավտոտրանսպորտային արտանետումների վերահսկողության առաջարկների մշակման արդյունքները (կետ 5.2, 2025 թվականի սեպտեմբերի երրորդ տասնօրյակ) և բուսածածկույթի ու թափոնների այրման դեմ իրազեկման աշխատանքները (կետ 3.1): Խնդրում եմ կցել փաստաթղթերն ու արդյունքների առկա ցուցանիշները:

7. Համակարգումը և առաջիկա արդյունքները: Ինչպե՞ս է ծրագիրը համաձայնեցված Երևանի քառամյա ծրագրի և EU4Clean Air in Armenia-ի հետ: Խնդրում եմ նշել միջոցառումների ու պատասխանատվության բաշխումը, 2026/2027 թվականի ձմռանն ընդառաջ և ձմռան ընթացքում գործողությունների ժամանակացույցը, ամփոփ հաշվետվությունների հրապարակման կարգը և պատասխանատու ստորաբաժանման կապի տվյալները:

Խնդրում եմ պատասխանել յուրաքանչյուր կետին և պատասխանը՝ հավելվածներով, տրամադրել e-request հարթակի միջոցով: Փաստաթղթերը խնդրում եմ տրամադրել էլեկտրոնային եղանակով, իսկ առկա աղյուսակներն ու տվյալները՝ նաև սկզբնական մեքենայաընթեռնելի ձևաչափով: Արդեն հրապարակված նյութերի համար խնդրում եմ տրամադրել ուղիղ հղումներ:

Եթե պահանջվող տեղեկությունը բացակայում է, խնդրում եմ հստակ նշել այդ հանգամանքը: Եթե այն տնօրինում է այլ մարմին, խնդրում եմ տրամադրել Ձեր տնօրինության տակ եղած մասը և, հնարավորության դեպքում, նշել մյուս տեղեկությունը տնօրինող մարմնին: Մասնակի մերժման դեպքում խնդրում եմ նշել իրավական հիմքն ու բողոքարկման կարգը:

Հարցմանն առնչվող փաստաթղթեր և հրապարակումներ

1. ՀՀ կառավարության 22.05.2025 թ. N 611-Լ որոշում և հավելված

<https://www.arlis.am/hy/acts/207222>

2. UNDP, EU4Clean Air in Armenia-ի մեկնարկ, 19.08.2026

www.undp.org

3. «Տեղեկատվության ազատության մասին» ՀՀ օրենք, հոդվածներ 6, 9-11

<https://www.arlis.am/hy/acts/218688>